

# Betg mo biatleta, mabain er mamma

Vernissascha dal cudesch «Selina Gasparin»

DA GION NUTEGN STGIER / ANR

■ **Gist frestg or da la stamparia è il cudesch che cumpiglia la biografia da la biatleta Selina Gasparin. L'ediziun na cuntegna betg mo aspects interessants dal biatlon, na, cun sfegliar en il cudesch emprenda il lectur er ad enconuscher la sportista sco mamma, ubain sco in carstgaun da famiglia.** Il pli tard dapi ils 14 da favrer 2014 enconuscha bunamain mintga uffant en Svizra la biatleta *Selina Gasparin*. Quel di ha la sportista engiadainaisa scrit istorgia cun gudagnar tar ils gieus olimpics a Sotschi ina medaglia d'argient en la cursa singula. Per l'emprima giada en l'istorgia da l'olimpiada ha la Svizra grazia a Gasparin fatg ina medaglia tar il biatlon.

## Ina autobiografia da 230 paginas

En in culp è la biatleta vegnida anc pli populara e quai er en noss pajais vischins, sco la Germania, l'Italia e la Frantscha. Cun obtegnair in plaz da podest tar ils gieus olimpics da Sotschi è lura er sa midada la vita da Gasparin e quai betg mo sportiv, mabain er privat. Ussa ha la biatleta mess en palpiri sias interessantas fasas da la vita ed illustrà quellas cun fotografias or da ses album privat.

## Ina gronda famiglia

En cuminanza cun il scribent *Philipp Gurt* ha Gasparin scrit ina autobiografia e dapi ier è il cudesch da 230 paginas cun ina ediziun da 10 000 tocs en vendita per in pretsch da 35 francs.

L'interess per la vernissascha dal cudesch «Selina Gasparin» è stà fitg grond mesemna saira a Cuira. Che la sportista ed autura è ina dunna cun ina relaziun fitg stretga tar la sia famiglia è spert crudà en egl cun esser preschents a la vernissascha ses geniturs, las duas soras e biatletas *Aita* ed *Elisa Gasparin*, «nonno» e «nonna», ina rotscha auters confamigliars e lura er numerus amis da la biatleta. Tut en tut in bel maletg, ina Selina Gasparin ventiraivla e la gronda famiglia da fans unida.

## Er in omagi al biatlon

Cun sia autobiografia tradescha Gasparin al lectur er sia rolla sco mamma, dunna, figlia, sora ed amia. Insumma ha sia vita privata er retschet bler spazi en il cudesch, quai ch'è dal reminent er il cas per las nozzas da Selina Gasparin cun ses um *Ilya Tschernoussow* la stad 2014 en Russia. Da pudair esser mamma e sportista da professiun, er quel aspect na manca betg en il cudesch scrit da l'autur grischun Philipp Gurt. Descrits ed illustrads èn lura er ils muments plaschaivels da Gasparin sco biatleta, però er ils temps sportivs main empernaivels. Il cudesch «Selina Gasparin» è cunzunt er in omagia al biatlon, in sport che vegn er tar nus adina pli popular, pli enconuschent e pli professional. Ina persuna che ha contribuì fitg bler che quel sport n'è oz er en Svizra betg pli ina disciplina a l'ur da tut ils sports d'enviern è segir Selina Gasparin, ella ch'è la meglra ambassadura per il biatlon sin champ nazional.



Selina Gasparin ha suttascrit mintga cudesch la saira da la vernissascha.

FOTO G. N. STGIER